



**HARIMAU** Malaya perlu dilindungi supaya spesies itu tidak pupus di negara ini.

Tengku Hassanal gesa perangi sindiket antarabangsa

# Perlu tegas lindungi Harimau Malaya

Oleh **ABDUL RASHID ABDUL RAHMAN**

**KUANTAN** – Pemangku Raja Pahang, Tengku Hassanal Ibrahim Alam Shah Al-Sultan Abdullah Ri'ayatuddin Al-Mustafa Billah Shah bertitah agar usaha melindungi Harimau Malaya yang diancam kepupusan dipergiat dan diperkasakan bagi memastikan imej haiwan yang terdapat pada logo jata negara itu terus kekal di negara ini.

Baginda bertitah, penguatkuasaan yang tegas perlu dilaksanakan selain keluasan hutan yang menjadi habitat haiwan itu wajar dipertingkatkan setiap tahun bagi tujuan tersebut.

"Kita telah mempunyai undang-undang untuk melindungi hidupan liar dan kawasan hutan, bagaimanapun tanpa penguat-

kuasaan sewajarnya undang-undang yang digubal ini tidak mempunyai sebarang makna dan tidak dapat mengekang sindiket pemburu haram antarabangsa.

"Kita memerlukan agensi kerajaan yang bersikap tegas dalam melindungi hidupan liar dan habitatnya," titah baginda sempena Hari Harimau Sedunia di sini semalam.

Selain itu titah baginda, peruntukan undang-undang untuk melindungi hutan simpan juga penting bagi membantu memelihara sumber tadahan air serta mengurangkan implikasi banjir.

Tengku Hassanal bertitah, Pahang yang mempunyai keluasan hutan kira-kira 57 peratus daripada keluasan negeri menyediakan habitat sesuai untuk pembiakan harimau yang jauh daripada penempatan manusia.

"Usaha dan keberkesanan dalam memerangi aktiviti pemburuan dan perdagangan haram akan gagal jika tidak seiring dengan penekanan yang sama terhadap perlindungan hutan dan saya juga bertitah agar kerajaan negeri saya dapat meningkatkan keluasan kawasan hutan setiap tahun," katanya.

Sementara itu, baginda bertitah Hari Harimau Sedunia yang disambut setiap tahun pada 29 Julai bertujuan meningkatkan kesedaran masyarakat umum tentang spesies harimau yang semakin diancam kepupusan.

Baginda bertitah, disebabkan pemburuan haram dan kemusnahan habitat, dianggarkan hanya tinggal kira-kira 150 ekor Harimau Malaya di negara ini dan bilangannya semakin merosot setiap tahun.